

李永節先生遺像

華亭周芳岩寫

并題



野態何煩彩
美痕爲
留模樣與兒
孫心中
應有難言意
不共攜
家住鹿門

戊戌季春日自題

龍湫山人確



潛夫李先生居當湖之乍浦登崇禎癸酉賢書余先伯祖茂芝公同年友也力敦古道以名節自勵工詩古文辭甲申後絕跡城市幽棲陳山自號龍湫山人家值日落兼有喪明之痛頽然自廢往來於海涯九峯閒慷慨悲吟寥寥寡和有司賢而訪之踰垣以避晚而飢寒益甚或餽之粟弗受也老夫婦蕭然茅屋績纓鞋編竹器以自食卒之窮困以終年八十二鄉人私謚介節先生予方孩少先君子每樂道之予心企焉輒思拜謁而先生逝矣及長交其嗣孫方山得借觀梅花月令蜃園諸集讀其詩想見其爲人者已數十年繼念未刻之書殘編斷簡必有存者欲訪問其嗣子孫而皆偃蹇以沒矣悲夫歲乙卯吾兒廣譽館於乍川獲晤李子來熊則先生之曾姪孫也思傳先業而發幽光乃搜羅散佚輯成蜃園遺集將付剞劂氏廣譽手錄之以質余幾讀之卒業慨焉歎曰先生少負異才有志當世是豈膏盲泉石哉有託而隱非得已也假令以其才隨時進取何難驟致通顯卽不然而非負耿介絕俗之概或受宗戚交遊餽給未必至於窮餓以老也顧迺潛鱗戢羽義不苟合置身於荒煙蔓艸冷水寒山之中吞聲匿影如窮人無所歸慙顛踣患難百折而不悔者蓋其清風亮節同於

五柳先生而悲涼憤激髣髴髮子之所爲故其文亦似之觀其隱林清修諸序與對聯自記之篇窮孝廉一生志行具見於斯而且時時以內省力行爲學則安貧樂道直造聖賢之途可以礪世磨鈍而豈等石隱者流哉易曰苦節不可貞先生之貞於節則苦也而甘矣披讀之下蓋不勝盡然哀其志而又悚然欽其義也於是乎書乾隆柔兆執徐之歲清和月年家晚學馮幾頓首拜譔


昔龍門之贊靈均也曰悲其志想見其爲人荆公之祭永叔也曰讀其文則其人可知謂人以文重乎實文以人重也廣譽少時從家君觀海乍川登陳山大人指龍湫之勝示譽曰此潛夫李先生遜跡地也因耳先生之名然未知先生何如人也年十五六工課之暇頗事歌詠一夕搜閱舊籍得先生梅花百詠挑燈讀之清而腴澹而旨蕭灑出塵莫可具狀不忍釋手遂過庭詢所自我父因歷序先生之勁節高風激昂慷慨抵掌以詔譽蓋自是不獨耳先生之名讀先生之詩而并悉先生之爲人矣且先生有明一孝廉耳使其挾此抱負不甘廢棄與當日之閭閻縉紳雍容步武博取人爵以榮身誰曰不然乃竟以松柏之操挺歲寒之節遇可窮志不可

奪境可困身不可輕秉太虛之浩氣立宇宙之綱常日月爭光中流砥柱鵠水乍川一人而已顧又念先生具玉節金和之品負超前軼後之才閉戶著書已多歲月茂陵他日求遺稿豈僅區區梅律百篇已乎因廣搜博采旋得蜃園集月令詩及九山志諸種惜皆殘缺全豹難窺然每得一篇輒什襲珍藏如夏鼎商彝不敢褻玩蓋文以人重有由然也茲值秋風瑁璫謝客烹茗朗誦先生明珠何待泣鮫人之句而我友鐵庵排闥直前奉一編以告曰此君平昔景仰李先生之遺製也李子來熊先生曾姪孫也恐墮先業徧求散軼輯成此編曰蜃園遺文介余以求序於君譽正襟受讀第見亭亭物表皎皎霞外如親警效於陽春白雪中恍然十五六歲時讀先生梅花詩光景也凡序傳書說論記詩文共二十九種旬日卒業不禁流連神往曰猗歟休哉先生殆比德於玉乎溫潤而澤心之仁也圭璋特達望之重也績密以栗守之嚴也廉而不劓節之介也夫以耿介拔俗之標舒泉石山林之志宜其煙霞嘯傲遺世獨立矣乃敦天倫篤友誼安貧樂道辭受不苟盎然流露於楮墨閒迄今讀褒忠序見先生之忠焉讀乞言啓見先生之孝焉讀還山說見先生之義焉讀哭子文見先生之慈

焉要其自少至老不怨天不尤人磨不磷涅不淄一生
之梗概俱括於對聯自記之中身隱而文彰名高而德
顯偉哉先生可以不朽矣廣譽末學小子蠡測管窺雖
累千百言亦不足道揚萬一行將抱斯編以質我父擬
一言以弁其端庶足發潛德之幽光而亦并見向之登
山悵望慨然想見其爲人者今則讀其文而其人可知
已然先生之爲人又何待讀其文而始知也哉時雍正
歲在乙卯長至前三日當湖後學馮廣譽肅颺甫拜題
於乍川之觀海旅館

錫禎自巳酉歲搜緝曾伯祖潛夫公遺文僅得二卷兵
燹之餘散佚固所不免而子姓之不善守藏亦於斯可
慨抱此隱痛忽忽二十餘年壬申春僑西泠獲親杭太
史董浦先生教益先生於友人處拾吾曾伯祖遺稿一
卷出示禎錫曰是君家之珊瑚木難也幸亟補入集中
且與同社諸子各惠題詠於簡端嗚呼念吾曾伯祖清
風介節不悔無悶自當有一段真精神不可磨滅者乎
居手披口吟不下數十百種今未能存什一於千百而
杭先生之加意訪羅表章恐後昌黎云莫爲之後雖盛
不傳倘當代名彥有以先生之心爲心互相搜輯俾得
珠還合浦詎非先生實始倡之哉謹加編次彙爲四卷

仍名之曰蜚園遺集云曾姪孫錫禎謹識



原稿凡例八則

一曾伯祖潛夫公所著蜚園文集十卷以無力授梓今皆散佚小子禎再四搜訪不可復得是編係集外者從戚黨閒綴錄殘稿妄加分輯聊備景仰先型之微意至於亥豕魯魚知所不免望高明改正實爲幸甚

一曾伯祖所著蜚園詩集昔蒙陸孝山陸亦樵諸先生釀金鳩材代爲付梓分爲前後二集蓋以甲申後悲涼感愴之作爲後集也今遺文亦倣詩集之例彙成

二卷

一曾伯祖名噪藝林才空士類爲一時人物冠冕遠近風雅流輩咸敬仰之所贈序文書啓若干首是編搜羅彙入以見吾曾伯祖文章品格在當時卽爲人所欽慕如此

一曾伯祖自國變後遯跡龍湫山中達官貴人嘗停驂蹤跡之名可得聞身不可得見惟社中知己逸士幽人相與往還或連牀夜話感慨悲吟或千里神交郵筒簡寄是編綴錄其往還贈答之什附於後庶幾流風餘韻披對昭然至於懷古雜詠諸作另彙一集茲概不錄

一是編共計序論書啓述說傳記雜文并古近體詩總


二十九種俱按曾伯祖之年譜分其次序庶無舛錯
一曾伯祖清風亮節詳載省郡邑諸志高隱傳及李氏
族譜是編采錄之以冠諸首又寧都魏冰叔先生與
周青士書一首備述吾曾伯祖之梗概及先生往訪
相拜灑涕情狀婉轉深細可當曾伯祖一則小傳兼
可當一幅行象圖謹并錄之

一曾伯祖遺象相傳閩人吳百緇寫絕肖角巾布袍憑
几獨坐有自題絕句云野態何煩彩筆痕爲留模樣
與兒孫心中應有難言意不共攜家住鹿門禎於雍
正丁未十月復加裝潢時禾中于湯谷先生聞之欣
然索觀并聯陸太史聚緱諸先生題贊想吾曾伯祖
當含笑於玉樓閒矣謹錄并是編之首

一按舊存書目所載曾伯祖遺稿甚富已梓者有忘機
社月令詩梅花百詠七言雜詠送秋詩就正草詩前
後集甲辰後集雲岫遊草毗陵遊草三山遊草九山
遊草各一卷未梓者有蜚園文集十卷山房日錄四
十卷古今觴詠集八卷隱林列傳十卷明隱林忠清
合傳四卷乍浦九山補志十二卷褒忠錄三卷灌園
日錄十二卷大東飽蠹篇一卷呼天外史一卷紀夢
集放言集山居雜志山居雜詠清修八則深省堂詩

話各若干卷迄今未梓者已散不可見卽已梓者亦頗殘缺惟月令梅花數稿而已嘗恨碌碌無能徧爲搜訪倘蒙好古先生有收得諸稿者出以見示俾禎錄成全集以庶幾吾曾伯祖之苦心不致湮沒則感激不獨在小子一人矣曾姪孫錫禎謹識

按此八則係先生從曾孫來熊氏編集時所著其文悉依年譜爲之次序余得此書後復於龍湫集乍浦志諸書及叢殘遺稿中采補以致前後錯亂又不得先生年譜而釐訂之爰爲分其體類妄加編次并輯補遺一卷以附後而篇首仍署來熊氏編以存其舊幸讀者其鑒原焉後學盛垌謹識



李潛初先生傳〔載海鹽縣志〕

彭孫貽

李天植字因仲乍浦人自海鹽縣籍入嘉興府庠中癸酉科舉人天植自爲諸生時工詩歌古文辭既登賢書公車歸屏迹不一干有司築蜚園與海內名流嘯詠其閒甲申聞變後不復上公車改名確字潛初遯跡龍湫山中糧絕不給好事者多載酒米以周之非其人雖飢不受也長吏守帥聞其名車騎過之踰垣避終不見每歲必賦三月十九日詩讀者高其風而哀其志也年八十二預知死日賦詩偃臥乃卒

蜚園小傳

施洪烈

潛夫李先生家世當湖之後所人也潛夫生於明朝神廟辛卯鄉舉於崇禎癸酉所自三百年來未有登賢書者潛夫始之卽以潛夫終之蓋時方嬉如而潛夫以心隱身閱鼎移潛夫遂身隱先是太公寄跡闐闐德可風潛夫遁跡山居有丈人抱甕之遺不爲絕俗自詭蕭然無累焉所著有志機社月令詩及和中峯韻梅花百詠送秋詩九山遊草皆已刻行世又九山志族譜古今觴詠集隱林列傳明忠清隱林合傳褒忠錄就正草七言雜詠飽蠹篇諸稿遠近見聞惟此一人名天植字因

仲又號蜚園居十二云

蜚園先生神道表

鄞縣全祖望

蜚園先生歿七十有餘年再絕世遺文散佚其從曾孫錫禎始哀其叢殘之作合爲數卷乞表章於當世予惟先生之大節在天壤無人不知顧生平顛末則未有詳述之者異日國史隱逸傳將何所考乃略爲撫拾簞文一通使表之墓先生諱天植字因仲浙之平湖乍浦人也曾祖某祖某父某父有隱德先生少而蕭散其於世事泊如也嘗曰無欲則心清心清則識朗識朗則力堅無欲則心真心真則情摯情摯則氣厚時時以誨學者亦頗耽清言登崇禎癸酉鄉薦浦上之以科名起者自先生始三上公車癸未其子諸生觀卒自以爲有隱慝痛自刻責遂絕意仕進改名確字潛夫彭仲謀作先生傳以爲國難後始改名者非也旣游遭喪亂遺妾遺婢殆盡尚有田四十餘畝宅一區并家具一切分畀所後子震與其女髡髮別其妻逕入陳山自是足不至城市訓山中童子以自給其自署曰村學究老頭陀居山十年陳山之僧開堂先生避喧始返蜚園復與妻居賣文取食不足則與其妻爲棕輶竹筥以佐之時有好事者

約爲月給供先生米力辭不受有司慕其高訪之踰垣而避其所賦詩皆弔甲申以來之殉節者蠶園者乍浦勝地可以望見海市者也又十年先生益困不復能保其園乃復以妻委之壻家而身寄食於僧寺戚友憐之相與贖蠶園而歸之於是先生復與妻居則年已七十矣所後子震亦稟先生教棄諸生顧以謀食走四方二老相對時時絕食歎曰吾本爲長往之謀顧蠟屐未能乖桴又未能至於今日悔之無及待死而已有鮑之食者非其人終不受或問以身後曰楊王孫之葬何必棺也又十年蠶園但存二楹雙耳失聰又苦下墜終日仰臥客至以粉版相問答魏凝叔自江西來造其廬相對而泣臨別以銀五錢贈之五反不受凝叔因以請曰此非盜跖物也乃納之凝叔因屬曹侍郎倦圃糾同志復爲繼粟之舉且謀其身後徐昭法聞之曰李先生不食人食聽其餓死可矣俄而使至則言先生果堅拒不受凝叔歎曰吾淺之乎爲丈夫也嗚呼信夫凝叔之淺也但知爲先生謀食而不知爲先生謀施食之人夫倦圃新朝之貴人也先生肯食其食亦何待凝叔故昭法之在吳中能食之者惟一退翁禪師餘莫能也昭法聞凝叔之舉而卜先生之必不食其可謂相知以心者矣

不數月先生死其時有鄭嬰垣者亦乍浦人也孤子絕俗與先生稱金石交前數年凍死雪中而先生亦竟以餓死仲謀又言先生能預知死日賦詩而逝意以爲禪定之功也予謂先生披緇而未嘗談空蓋其靜極而明何必從蔥嶺得力乎先生生於萬曆十有九年九月二十八日卒於康熙十有一年二月初六日（原本作初九日）邇其年八十有二娶黃氏葬於牛橋之西其所著蜃園集自震死乏嗣十不存一惟續修乍浦九山志世閒尚有傳者其銘曰

餓死事小失節事大正叔之言先生不愧百年宰木護茲遺蛻

禾中兩孝廉傳（巢端明先生不載入）

張庚

孝廉李氏名天植字因仲平湖人居乍浦海上蜃園崇禎癸酉舉於鄉三上公車癸未其子諸生觀卒自以有潛慝痛自刻責遂絕意於仕進會國難乃改名確字潛夫喪亂後尚餘田四十餘畝宅一區乃并家具分與所後子震及女而與妻別入陳山自是足不入城市訓童子自給居七八載陳山寺僧開堂聚聽者衆避喧反蜃園復與妻居賣文以生不足則與妻爲樓輦竹筥佐之

又十載益困不能保其園復以妻委之壻家而寄食於僧舍友戚憐之相與贖蜚園歸之於是復與妻居時年已七十矣所後子亦稟訓棄諸生謀食四方老夫婦白頭相對時時絕食有餽者非有故不受又十載蜚園僅存二楹雙耳失聰又病下墜終日仰臥客至以粉版書相問答魏冰叔自西江來造其廬先生與之粉版冰叔書竟先生視姓字則強起張視之泣老淚滋滋下冰叔亦泣時方絕糧冰叔探囊得銀半兩爲買米炊飯共食作書興嘉與布衣周青士屬其集知交爲先生月給冰叔過吳門見侯齋侯齋者崇禎壬午舉人徐枋亦不入城市者見書藁謂冰叔曰君意良厚但李君不受人餽君力量不能聽其餓死可也及青士輩往餽果堅拒不受未幾卒乍浦有鄭嬰垣者孤子絕世與先生爲石交先二年凍死雪中至是先生餓死臨歿云我無愧我老友矣時康熙十一年年八十有二葬牛橋所著蜚園集口口子歿乏嗣遺藁不可得矣惟續修乍浦九山志迄今猶有珍之者

魏叔子先生與周青士書

禧白青士足下僕前同沈進之往乍浦觀海中日出遂因周雲虬交李潛夫先生潛夫名天植崇禎癸酉登賢